



UKA 2022/86

19/10-2022

Nivi Olsen

Immiaaqqat imeruersaatillu kulsyrimik akullit Kalaallit Nunaanni puujaasat dås-illu angissutsit assigiinngitsunik tuniniarneqarsinnaanngorlugit puui pillugit nalunaarusiaq allangortinnerasigut Naalakkersuisut qulakkeerinninisaat pillugu Inatsisartunut aalajangiiffigisassaattut siunnersuut. Utertitsisarnermut aaqqissuussami puujaasat dås-illu ilaasinnaassapput. Siunnersummik akuersereernerup kingorna sukkanerpaamik allannguisoqassaaq – kingusinnerpaamilli 1. januar 2024.
(Inatsisartunut ilaasortaq Jens-Frederik Nielsen, Demokratiit)
(Siullermeerneqarnera)

Qujanaq Demokratiit Inatsisartunut ilaasortaataannut Jens-Frederik Nielsen-imut siunnersummut pitsasumik silatusaartumullu.

Demokratinut pingaaruteqarpoq, innuttaasut annertunerpaamik kiffaanngisuseqarnissat aammalu sapinngisamik amerlanerpaanik toqqagassaqarnissaat. Inuunermut tunngasuni tamani tamanna atuuppoq.

Taamaattumiguna kissaatigigipput, akileraartarneq- akitsuusiisarnerlu sapinngisamik appasinnerpaaffissaminissasoq imaasilluni, inuup nammineq aalajangersinnaallugu, nammineerluni aningasaatimi sumut atornissai.

Kiffaanngissusermik toqqagassaqarnissamullu periarfissat siunnersuuteqarnermi uani tunngaviupput. Soorliuna, uagut kalaallit akuerisariaqaripput, tuniniakkat uani immiaaqqat- sodavandillu pisiniarfinni nunanut allanut sanilliullugit annikinnerussasut? Piffisanngorpoq taassuma eqqarsartariaatsip allangortinnissaanut.

Tamanna tunngavigalugu Demokratiit Inatsisartunut ilaasortaataanit Jens-Frederik Nielsen-imit una siunnersuutigineqartoq iluarismaartorujussuuarput. Siunnersuutip kingunerissavaa, immiaaqqat imeruersaatillu kulsyre-mik akullit Kalaallit Nunaanni tamarmi puujaasatut qillertusatullu angissutsit assigiinngitsunngorlugit tunisaasinnaalernissaat. Tamanna ataasiakkaanut pitsasuuvoq inuiaqtigiinullu pitsasuuulluni.

Taamatut oqaaseqaateqarluta siunnersuut akuerisassanngorlugu innersuussutigaarput Inuussutissarsiornermullu ataatsimiititaliami suliareqqitassatut innersuussutigalugu.